

清康熙南海普陀山志

裘璉

撰

二

南海普陀山志卷之六

定海總兵官

古閩藍理

溫陵施世驃

禮部侍郎

錢塘高士奇鑒定

翰林院編修

慈谿姜宸英

翰林院纂修

鄞邑萬言

吳地山民朱謹編輯

法統

粵自大雄氏于檀特山中六年修證說法四十九年
折服攝受所應度者皆已得度究而言之世尊實無

一法與人法尚應捨焉得有統自拈花微笑涅槃會上宛然授受相傳二十八世自初祖西來震旦六傳而至曹溪化緣漸廣根器漸熟證道之人非指可屈五宗而下源源相接或隆或替法統井然不可得而淆也普陀法統有真歇了禪師倡導于前大導師之後難乎其繼也乃又有自得以下諸師續起而延之亦如晨星落落不可多見乃因侯志自真師以下若而人依次編輯外此雖有大德高行如大智融禪師與雲棲憨山紫柏諸大師以其未詳記莭亦不與于法統雖名稱普聞如從上諸大老以其未經卓錫提

唱于茲山，亦不與于普陀法統。此宗門之格例然也。曾子宗尼山之道，而儒學遍于域中，飲光肇雞足之傳，而淨行半于天下。其間忘身忘世之徒，草衣木食，旁若無人，又未可盡以法統繩之。故亦非以與者爲最，不與者亞之也。近今之主席者，普濟潮公旭禪師、法雨別公統禪師，一追真歇之芳蹤，一創特起之禪席。其中興叢林、易講律爲禪宗，則一也。繼潮公之席者，先之以古公忘禪師，後之以自公果禪師，皆英傑也。而且，有將來之不可知爲何人者，靡有涯也。要皆自拈花微笑以爲之端，則謂法統之昉于迦葉也，亦

宜猶之儒者之文字何莫非一畫之所自出則以義
皇爲文字之統也亦無不宜

普濟寺

宋真歇禪師諱靜了蜀之雍氏子也生有慧根眉目疎
秀神宇靜深見佛則欣戀不捨年十一依聖果寺俊
僧受業又七歲試法華經得度具戒聽講元解經論
以爲言說終非究竟出峽直抵汚濁扣丹霞子淳禪
師淳問如何是空却時自己師擬對淳掌之師契旨
翌日淳上堂曰日照孤峰翠月臨溪水寒祖師元妙
訣莫向寸心安師趨進曰今日瞞某甲不得也曰試

舉看師良久淳曰將謂爾管地師便出輒北遊五臺
京汴南抵儀真謁長蘆祖照紹興元年辛亥自長蘆
南遊浮海至此結庵山椒匾曰海岸孤絕處禪林英
秀多依之郡請于朝易律爲禪時海山七百餘家俱
業漁一間教音俱棄舟去日活千萬億命後王國清
雪峰育王龍翔興慶雙徑凡七處說法五承紫泥之
詔得度弟子四百嗣法者三十餘人所編語錄二集
若干卷行世此山禪宗蓋自師始稱開法第一世云
自得禪師諱慧暉會稽張氏子自少得度于澄照寺孤
錫雲游見長蘆真歇以爲有所證于閃電機下竟南

歸後謁宏智徹法源底紹興丁巳開法補陀馳其提
唱語于宏智宏智大悅其語曰朔風凜凜掃寒林葉
落歸根露赤心萬派朝宗船到岸六窗虛映芥投針
本成現莫他尋性地閒閒耀古今戶外凍消春色動
四山渾作木龍吟于是補陀風範與天童竝峙

繼以了然禪師

徑山
悟嗣

弁至瀾禪師

大繼業禪師

恩求以禪師

雪屋立禪師

垣堂圓禪師

遽庵成禪師

還庵琛禪師

鑑庵實禪師

小庵高禪師

閑雲禪師諱德韶佛照光嗣也嘉定間來主是山言于朝賜錢萬緡修飾殿宇殿成御書圓通寶殿及大士橋以賜師泐龍章閣藏焉

大川禪師諱普濟徑山琰嗣也明州奉化人題世尊出山相龍章鳳質出王宮肘露衣穿下雪峰智願必空

諸有界不知諸有幾時空嘗纂修五燈會元行世

鐵腳清禪師

古巖顓禪師

深谷喚禪師

無咎吉禪師

寒巖悟禪師

夢窗禪師諱本清山陰于氏子肄業郡之天章上堂德

山入門便棒臨濟入門便喝通龜成兆終不能靈寶

陀者裏寂然不動感而遂通馬無千里謾追風

石屋環禪師

寒巖舉禪師

松州基禪師

東巖日禪師

西巖
慧嗣

混溪清禪師

白雲恭禪師

愚溪智禪師

東洲永禪師

松源岳下
石林華嗣

一山寧禪師

次翁元禪師

險崖遇禪師

太虛冲禪師

元孚中禪師名懷信天童坦之嗣俗姓江氏明州奉化人年十五離家從法華院僧子思執童子之役已而祝髮爲大僧受具戒于五臺寺間延慶半巘全公宏三觀十乘之旨復與之游久之且歎曰教相繁多浩如烟海苟欲窮之是誠算沙徒自困耳往叅天童竺西坦公大徹元旨岫公每稱之曰信公乃洞宗亦幟濟室白眉也泰定丙寅行宣政院請師出任明之觀音寺天歷己巳遷任此山師不以位望之崇效宅山飾車輿盛徒御以誇衒于人自持一鉢丐食吳楚間

鎮南王具香花迎至府中虛心問道宣讓王亦遣使
者奉旛檀香紫伽黎衣請示法要師隨其性資而導
之由是諸侯庶民無不望風瞻敬施資填委姑蘇產
奇石師遂購善工造多寶佛塔五層載歸海東俾信
心者禮焉宣讓王施鈔建駙馬都尉高麗王驛而吉
尼丞相撒敦以師行上聞詔賜號廣慧妙悟智寶宏
教禪師及金襴法衣一襲師居此山十四載嘗王金
陵龍翔寺當明兵下金陵僧徒散處師獨晏坐目不
四顧執兵者滿前無不擲仗而拜高皇帝嘗親幸寺
中聽師說法特改大天界寺師將告終前一日帝統

兵江陰夢師見帝問曰師來何爲對曰將西歸告別耳帝還問師遷化與夢中符詔出內府金幣助其喪事舉龕之夕帝親致奠其寵榮之加近代無與同者歸然爲一代人天之師師有五會語錄行于世

古鼎禪師諱祖銘徑山端嗣也奉化應氏子元叟住靈隱師往叅一日入室叩黃龍見慈明因緣端詰曰卽如趙州道臺山婆子被我勘破慈明笑曰是罵耶你道二老漢用處是同是別師曰一對無孔鐵鎚端曰黃龍直下悟去又如何師曰也是病眼見空華端曰是不是師擬進語端便喝師當下廓然至正七年

元帝賜號慧性文敏宏覺普濟禪師至正戊戌將遷
寂遺書囑丞相外護復書偈曰生死純真太虛純滿
七十九年搖籃繩斷擲筆而逝茶毘舌根數珠皆不
壞舍利無算于徑山隆教寶陀分建塔焉明宋文憲
公濂作師四會語錄序贊及宗銘

大方聘禪師

天童
岫嗣

朴翁淳禪師

元虛照禪師

竺芳聯禪師

竺西坦下
正宗庄嗣

所庵睿禪師

大千禪師諱慧照東嶼海嗣也永嘉麻氏子年十五往
依縣之瑞光院了定蓋師從兄也長老良公知爲法
器卽剃落爲弟子稟持犯于處之天寧首謁晦機熙
公于杭之淨慈未契圓證一日閱真淨語至頭陀石
擲筆峰處默識懸解流汗浹背天歷戊辰出世樂清
之明慶集衆而誨之曰佛法欲得現前莫存知解縛
禪看教未免皆爲障礙何如一物不立而起居自在
乎所以德山之棒臨濟之喝亦有甚不得已爾聞者
說繹而去至正乙未遷主此山先是寺以構訟而廢
師以訟興在乎辨難太迫一處之以寬慈絕勿與較

且曰我佛得無諍三昧所以超出羣品我爲佛子可不遵其教耶衆服其化

玠禪師氏族法系俱莫之考今按明宋文憲公濂所撰淨慈孤峰德公塔銘其畧云孤峰族姓朱世家明之昌國父有成母黃氏父與補怛洛迦僧玠公交玠聞雞聲入道凡說法必鼓翅爲雞號玠亡已久黃夢玠來託宿覺而有娠歷十四月而生據此說可知孤峰卽師後身也

明大基禪師諱行丕宗說兼通行解相應洪武初由佛隴來主是山

本初原禪師

祖芳禪師諱道聯薦巖義嗣四明陸氏子年十四禮崑山薦巖悅堂顏得度秉戒于鄞之五臺還侍物先義于薦巖有所造詣後出世台之廣孝遷紫籙及麻峪景山明之補陀越之能仁末主淨慈蜀王賜衲衣孟鉢永樂丙戌朝廷徵師爲釋教總裁有拙逸語錄行于世

本朝潮音禪師諱通旭松江華亭俞氏子也祖籍新安居童子時每遇食以手擎木作梆聲里人詢之曰吾集衆以會食耳父母驗其非凡乃送歸補洛雍染于